

# **Kolosai**

## **Kine Kine Korop Pamaike Ea Wane Lewet Yemo Kristo, So Anutu Wane Gege Numa Me Tanik Manik Ene Wenen Kristo Wano Wat Watko Pamanmaike**

### *Mosop Don*

<sup>1</sup> Paulo, na Anutu wane pidon Kristo Yesu wane aposolo okangalane Anutu onjom biranange, so kimaze Timoti ene wenen.

<sup>2</sup> Neto Anutu wane nei nerek magu, Kolosai matko kimakopse Kristo wano nine tope kiaro mali malip korop gemami, ninane kibi iwa qe nibonmaite,

Anutu Magazenjo maine wet menan so peam niboniake.

### *Bakom Kito Meje Mejen So Mali Malip Korop Gege*

<sup>3</sup> Nene naso banem mejenka okanmaine, naso eao nere ninane detsorokenem paki, Anutu Waomze Yesu Kristo wane Magaine bakomine kito mejenka okanmaine.

<sup>4-6</sup> Nere ninane don mo iwa yale detmaite, sigi maep wane don wele mo ninano wakonge detmami, nine kine kine bile, ea mo malip kakoi, ea mo Waom onjom ninane ma wakone more qeliwo motke, nine maikei wane tomaka gemami. Pakimo, nine yalewa wane Yesu Kristo

malipka luke gemami, so Waom wane magu nei n̄erep korop wet maep okan onmami. Pakimo, kepe ban̄em nei n̄erep loutneño malipka more sigi maep ra qelañane mogare arimami, eñane gegeene ea mo maine menañmaike. Tego yewaka ñinane keuo wakonge, ea wane ñine kieke more mikepka sigi maep ea Waom wet maepinane kine mo maine dere lulukmami.

<sup>7</sup> Ñine Epaprasño sigi maep wane done maine mo yewa kieke kito ñidangi detkoi, Epapras eñe Kristo wane urata nei wekumane, eñe n̄enerop urataze weku, so ñene eñane manerop simin ñonmaike, eñe ñine qesiñ ñune more Kristo wane urata maine mau Luke wamaike.

<sup>8</sup> Nene mo oñom Waom wane nei n̄erep magu eñane don tanik manik so simile daleo detlukkene, don kisi yewa mo Asu Koboboineno ñibonge, ea mo korop nedan wareke.

<sup>9</sup> Ñinane don kisiñine maine mikep detkone, naso yewaoka kieke ñene naso ban̄em Waomño qesiñ ñuniakane, ñinane meñenka gemaine, ñene Waom eñine simileine detkaikei wane, so Anutuño eñine simileinane dereret, ea Asu koboboine wet dereret kine kine, ea qe watke ñiboniakane olat okanmaine.

<sup>10</sup> Paki mo ñine ban̄ eweke more Waomño eñine nei n̄erewekoune gekei wane detmaike, ea wane rokop gekei, so naso ban̄em ñine urata kine kine ma okanbi, tanik manikñine kaki menageake, pakimo ñine ban̄ urata kine kine loutne maine maikai, so naso yewao Waom eñine detluk kaikei, so ñine wet dereret ñine naso ban̄em Anutu wano more en̄erop gege eño ban̄ sua ariake.

<sup>11</sup> So nene iwa yale menenka okanmaine, nene Anutu enine zonom togogole wekumane, zonom yaline eajo ma togole njungi, nene maine togole okora more, umat kine kine kutnjino waki ewekeu paki, wet maepko batneka kauke okorau, umat ea ban mida leleake, paki nene wet pese dere bakom kitokei.

<sup>12</sup> So nene batneka Magak bakomine kitokei, ea yemo, mo onjo njibuki nene mo tanik manik me numa maine gesokmami, ea wane nene ban kine kine mayakakatne mo njinane binjek qeke, ea maikei, nene ea ban Waom enine nei nerewekoune enerop maikei, tego me magu yewa nene mo Waom wane qelanjan koto gemaine.

<sup>13</sup> Nene mo panaman koto gekone, ene panaman wane zonomgo nene makok njonge paki, nebu sesenone ari enine gipon maepinane mat urum koto bira njonge.

<sup>14</sup> Yemo nene enane wenjemineno mo qolenjone more siwot njonge, so sot turunje eamo mo mata-liki siukke.

### *Kristo Wane Masi So Uratainane Paulono Rake*

<sup>15</sup> Nene Anutu maine mi kaikene, no gipole Kristo ene Anutu sane, deno mi kakaine, enine kait toqa Anutu yale, ene Anutu enine alakan Medep, ene Anutuno yeye kine kine korop ma wakonge, ea wane lewet so enane suaineene.

<sup>16</sup> Medep eajo, enane kutko so metino Anutu ene yeye kine kine korop qeli kotino so kepe kutno ma wakon wareke, kine kine deno kakaine, so mi kakaine, ea so anelo kine kine zonom ewe bibienerop, so asu zonom gorop, so kine kine

natne asu qotkoinane zonom gorop, ñei waom, ware ware, so ñei ñetne korop, Anutuño yeye kine kine korop enano so enane binjek ma wakon wareke.

<sup>17</sup> Kristo enje yeye kine kine korop ma wakongi, enane bango mokaka qei kinoka kiekie, ge sari geke, so yeye kine kine ea korop enane zonomño malipongi mayakakatneka, numaeno numaeno pawaremami.

<sup>18</sup> Doku tau tau magu, enje enane kie metine korop, enane lewetene, yemo onom okanmaike, doku tau tau maguño enane solaine, enje so-lawane gege ma wakone more warekaki, doku tau tau enje gegeinerop okane pamaike, enje gege ea wane kine, enje Anutu wane medep alakan wako wakone, enje seu seuo ñine wieke, ea wane kie kiek, onjo kiekie wisikae wieke, yemo enje wekukuño alakane yeye kine kine korop qeli so kepe kotino, enane numaene maine onjo ma mo leweteene okanmaike.

<sup>19</sup> Anutu enje detki menangi, gipole enje onomka Anutu enjine gege so zonom wane namuñine, enano wat watko payakane enje qe watke luke mange.

<sup>20</sup> Anutu enje yeye kine kine korop, qeli so kepe kotino, koso ebu more, enjino bira oniakane, so wet weku okanikei wane wetkeki paki, gipole birakaki, gipoleño kibego seukki, wenjemenjo peam so gege maep ma wakonge, pakiso yeye kine kine korop, kepe kutno so qeli kotino pamaike, ea koso ebu mainone more, enjino takotone more bira onwareke.

*Yesu Seu Seuinenjo Milinjonge*

<sup>21</sup> Njine mokaka Anutu ndekkau paki, eri ekeket gekoi, so Kristo wane ndakoune aman okane gekoi, onoka wane njine borikine kine kine makoi, so wetke magekoi, ea wane.

<sup>22</sup> Wane ukude yemo Gipoleŋo sola bikumine korop wakone more kibere qabego wisika qolu seukke, masi yewa wane Anutuŋo enjine ndakoune nebu miliŋ nonge, wetine weku okangi, yale okangi paki nebuki, koboboine, libe libe qelaŋan gorop, so sot midaine okane enjine kaitino gekei wane biranonge.

<sup>23</sup> Ea wane njine takotke more, mali malipŋo nago nagon njine okangi, eao ra bidange togogole okorakei, paki njine ndidomka misuk detonbi, sigi maepŋo teba teba ma wakone njibonge, ea kine kine manepŋo misuk ruzakki buratke kesiake, don kisi maine iwa yemo nei nerep korop kepe banem ra edan warekone, na Paulo sigi maep iwa, ea wane qelit nei okangole, paki, kepe banem nei enano njene zonom eaŋo qebin nongi, urataze sorin borin mamaine.

### *Pauloŋo Kolosai Doku Tau Tau Magu Qesinonge*

<sup>24</sup> Na njinane rawe paki, wikile kutno ge more, ukude na oi bakom so wetne pesemaiké, detpe nae solaneŋo wikile desikale, yemo na Kristo wane solainane wikile sotakine pamaiké, eamo doku tau tau magu, ea takotke qesinŋa wikile desikale.

<sup>25</sup> So na doku tau tau magu enane qelit nei, Anutuŋo neuki paki, urata ea mawe njine menangei wane ra ninge, ea yemo Anutu enjine donine korop ra qelaŋanbe, rokopkeakane ninge.

<sup>26</sup> Don ea yemo sane, eņe motkeki sankā qei kino ņine nasoine nasoine korop pa saki, ņei kine kine eņe korop mi detkakoi, wane ukude yemo ņei ņerep doku tau tau magukoune eņane kaitko didiwo maputulake sikan ongi, ka waremami.

<sup>27</sup> Anutu wetinane kine yemo iwa yale, don saine ea tingo ra wakongi, ņei ņerep magu koune eņe detkei, don san riwe morianine kakapa suaine, so qei ewe zonom gorop, iwa yemo eņe ņei ņerep magukoune korop, ņine Yuda ņadino gemami, eņane biņek mage waremaiķe, so don sane yemo iwa yale, Kristo eņe ņinane kotoņino gemaiķe, ea wane kine yemo ņine baņ Anutu wane kibi qelaņane ea weneņ eņerop qeliwo makei.

<sup>28</sup> Ea wane ņene Kristo wane don kisi ņei ņerep korop ra ņidan okanmaine, ņene ņei ņerep korop girem ņidan okanmaine, so kito ņibon okanmaine, yemo korop wet so dereret korop, eamo ņei ņerep bonep bonep ņibuņem, ņine doku tau tau magu wele okane, Anutu wane kaitko maine lotke more, kotoņine menaņgi, Kristorop geķei.

<sup>29</sup> Ea mawe qoeakane, na urataine togogole wikilerop, so qeķa makainerop mamaile, Kristo ņo zonom suaine more ninmaiķe, eaņo naņane kotonu urata ma qelaņangi, na urata ea gereunerop mamaile.

## 2

*Togogleķa Kristo Malipķa More Isi Don Kine Kine Ea Korop Qepap Kaikene*

<sup>1</sup> Njine iwa yale njidanbe desikei wane nanmaike, na Laodikea matko nej njerep doku tau tau magu gemami, njine korop so nej njerep doku tau tau magu natne eje kaitne mi nangoi, njinano urata suaine zok, ea qesiŋ njunikalane ma okanmaile.

<sup>2</sup> Na urata togogole yale mawe, enjane kotoeno sorin borinjo maine watke payake, so eaŋo ma wisikae njungi, Anutu wane nej njerep enjerep wet maepjo wenenj orodonka qeturage maine weku paki, eje dereret welenjo riwe morian wat watko tebakaki sarimaike, ea mage gekei, paki eje ban Anutu wane san qabuine detluk kakei, ea yemo Kristo onjom ea wane kine okanmaike.

<sup>3</sup> Eje yemo ki, eaŋo qekokki korop Anutu wane wet dereret so dereret abonjine kine mane kine mane, natne Kristo wane san motkeki pamaike, ea didiwo wakon wareake.

<sup>4</sup> Ea wane na njidanbe njine detonbi, nej natne edo misuk isi don so aŋa kelok okane, eaŋo isiŋunikei, ea wane na don iwa ramaile.

<sup>5</sup> Na solanenjo yemo abaran gemaile, jo wetnenjo yemo njinerop gemaile, paki njine mali malipnjine Kristo wano motpi paki, gesoke togogole koboine okorau njunbe, wetne menanji bakom kitomaile.

### *Kristo Wano Kito More Wisika Gege Maikene*

<sup>6</sup> Njine Kristo Yesu eje Waom njine okaniakane makoi, wane enjane gegeo takotke more enjerep wenenj gekei wane rake.

<sup>7</sup> So njine enjano togogole more okorakei, yemo ekiŋo kepe qeirop njodine ma qotke okoramaike, yale ma qotke luke okorakei. So mat bosin

togoleŋo maŋem metmaike, ea wane rokop ŋine mali malipŋine togoleka bosin ŋine Yesu Kristo eŋane so sigi maepine kito ŋidangone, yewa wa kutno motpi payake. So mali malip wane numa kito ŋibone more sikan ŋungone, ea wane rokopko mali malipŋineŋo manerop sua togoleake, so Anutu bakom man manŋo ŋinano manerop pa ariake.

<sup>8</sup> So ŋine wenen kaulukkei, ŋei manenŋo eŋine wetko ŋine isi don ŋei dereret isisine, wele midaine, ea kito amanagu sa gekoi, ŋei yaline eŋe esep milop kopŋine mo sogine mage sakoi, eŋane dereret so kepeo ŋine, asu qotkoine ŋetne eŋano ŋine, so ea eŋe Kristo wano ŋine wet dereret koboboine, ea mi magemami wane, ŋine ea wane diam seleleine makei.

### *Anutuŋo Kristo Wano Takotŋonge*

<sup>9</sup> ŋine mo det waremami, Anutu wane wisika gege tanik manik, eanŋo Kristo wane kotino so solaino korop watke kepeo geke rokopke ware pamaike, paki, eŋe siluŋ ŋei yauwine yale ŋenane rokop wakonge.

<sup>10</sup> Kine kine zonom gorop eŋane lewet so ŋine gege, ea eŋerop tako rakot wenenŋe gekoi wane ŋibonge, Kristo eŋe gege so numa kine kine mot okanmami, ea wane ŋetne, so zonom kine kine pa ebonmaike, ea wane asu koboine so qotkoine eŋane ŋei waom suaine magu eŋane Lewet so Wawaineene.

<sup>11</sup> Eŋano takotke eŋerop gekoi, yewao ŋine kibi ŋibuke, ŋeiŋo sola kita kitat kibi, eamo sola waneka midakaka, ŋo yemo Kristo eŋine kibi,



gegenine sogine borikinejo watke watkine, ea wane zonom qe more siwot njungi paki, koto njino kibi njibuke, yewano masi koboboine okanmaike.

<sup>12</sup> Njine miti doku taukoi, naso yewao njine Anutujo Kristorop wenen denesereo duknjunge, wane njine koso Anutu wane zonomjo Kristo denesereo njine koso ma wieke, njine yewa malipka more miti doku tauwi, Anutujo njine koso Kristorop wenen ma wiriknjungi wiekoi.

<sup>13</sup> Njine mokaka qelan, solanjine Yuda wane kibi midaine geu paki, borikine kine kine qotkoine mau, eano onja onjine mataliki seu seune gekoi, naso yewao yemo njine sozi numa gesokkoi, pakimo Anutujo yemo siluj seu seuonjine Kristorop wenen ma wiriknjungi, wisikae wie more gege njine wakonge, so Anutujo turunje ea korop qelinwareke.

<sup>14</sup> Ene sot kine kine okane gekone, ea wane rara togon donjo sotze makoke neboniakane, zaleine so nasoine more numaine kibiwo qe more sake, so nebu ma ket biranjongi, enane zonominane bango gekoi, so dongo bira njoniakane rokop, eamo Anutu Magak onjom korop sauke rakoke qeke matali more, ra rokop wane numa ea kirunajo Kristo wane kibego rasu pelekki siukwareke.

<sup>15</sup> So kibenj qabenj kutno okora more, asu togogle enane zonom matali wareke, so Kristo ene onjomka nei waom so nei wawaine enane zonomgo njine makok naguke, ene asu qotkoine wawaine so zonom gorop enane zonom ma qororongi paki, nei njerep enane kaitko yuanone more, berum maki paki kineene ma wakonge, so ene

iwa yale sikanonge, eņe mo yuanone more maki, zonomene mida lele waremaike.

*Rara Togon Don Kine Kineņo Mi Mapikņoniake Nene Mo Yesu Kristorop Seukņem Qoeke*

<sup>16</sup> Ea wane ņei mane detkau, oņo ņara nene me doku nene, me zonom mama naso nigatne met met wane me meso musele ea wane taboņ met met wane, me qezareko taboņ met met wane numa mane misuk mosiake, so qom qeqe don okan ņuniake.

<sup>17</sup> Kine kine korop yaline, ea yemo baņ ņado kine kine wakoniake, ea wane oņa oņaine, ņo wele yemo Kristo.

<sup>18</sup> ņei natne eņe enņenane ra okanmami, eņe mayakakatne, onoka wane eņe wetene zingeki kulu kuluo kine kine ka okanmami, so solaņoka ketkele sola geu paki, aņelo meņenon okanmami, ņei yaline detonbi misuk maket bira ņunikei, ņei yaline eņe dereret sogine mogare okoramami, eņane dereretenane tanikene yemo korop kine midaine eņe enņenane detpi, mayakakatne okanmaike.

<sup>19</sup> So eņe Kristo maine mi malipka luke okoramami, oņo lewetze, ņo ņene kie metine so sola bikumine, Kristoņo kie mete so sola bikum ea korop warekaki, eņane bango geki ņara gume kamaike, so tutuine ea maturage more ginogom gorop malipkeki, Anutuņo suayakane det okanmaike, ea wane rokopko zonom mangi, sua togole okanmaike.

*Seuke More Kristorop Weneņ Gekene*

<sup>20</sup> Njine Kristorop wenenj seukkoi, paki kepe so qeli wane asu qotkoine zonomjo warenjungi gekoi, ea mo korop qelij warekoi, pakimo njine onoka wane kepe iwa wane nej okane gemami? Njine onoka wane don numa iwa yaline dere tewekmami?

<sup>21</sup> “Yewa misuk makene,” “Yewa misuk nekene,” “Ge yewa detkanom, enj gejne solanono misuk pora uagangep me?”

<sup>22</sup> Rara togon don kine kine ea korop njene maikenane rau, urataine atak weku manjem eaka bori okanmaike, so ea yemo nej edomka rara togon don kito ebon ebon wane don so numa ea motkoi.

<sup>23</sup> Welekatne, rara togon don yaline, yemo iwa yale kaikene, enj miti donjo nebu wie wet dereretze, ea geu kesiake, pakimo solanoka qe-binjone gereune okan njonikei, ea wane nej natne enj ramami, rara togon don eamo numa so dereret maine, solanoka ketkele sola geu paki, so anjelo menenon okanmami, ea wele midaine, jo rara togon don yewanjo maine mi qesinj njoniake, ea wele midaine, so gege me wet dereret sogine ea mi geki kesiake.

### 3

#### *Njine Mo Yesurop Wisikae Wiekone*

<sup>1</sup> Njine mo Anutujo Yesurop ma wirik njungi wisikae wiekoi, ea wane njine wetnjine motpi, weti qeli kotino yeye kine kine pamaike eao payake, ea wane urataine maikei, yewao Kristo enj Nei Waom wane metino, Anutu wane wonino metmaike.

<sup>2</sup> Ea wane n̄ine wet dereret n̄ine motpi, kine kine weti wane koboine ariake, iwa kepeo yeye kine kine pamaike, yewao misuk motpi payake.

<sup>3</sup> N̄ine, mo kepe wane ra more seukkoi, n̄o n̄inane gegeṅine yemo Yesurop weneṅ Anutu wano san siu siuko pamaike.

<sup>4</sup> N̄inane gegeṅinane wele so kine yemo Kristo, wane eṅe didiwo wakoniake naso yewao, n̄ine baṅ yaleka eṅerop weneṅ didiwo wakonikei paki, eṅane qeli ewe zonom so qelaṅaṅ ea wane kotino bira n̄uniake!

*Nene Wakonluke More N̄ei N̄erep Musele Okan-gene*

<sup>5</sup> N̄ine koto n̄ino kepe wane simile kine kineṅo urata ma okanmaike ea qeu siukeake, kine kine iwa yale, n̄erep yau yaup ebu ebu, masi tanik diinerop oka okan, borikine mama wane qom wieki, simile zok mage mage, sigit borikine, so wetṅo n̄ei natne eṅane kine kine wane bailalaṅ qole qole, ea yemo lopio so waom isisine meṅenka okanmami.

<sup>6</sup> Ea wane n̄ei yaline borikine kine kine me masi tanik manik ea okan more, Anutu sot osiosi okankau, turuṅene borikine ma more toma onmaike, eṅane aṅaine mi dere tewek okanmami, n̄ei yaline eṅane kuteno baṅ payake.

<sup>7</sup> Sogine n̄ine yalewaka n̄ei yewa eṅerop geu, gegeṅino tanik eaṅo watke paki, masi kine kine yaline ma gekoi.

<sup>8</sup> Wane ukude yemo n̄ine kine kine ea korop qeliṅ warekei wane ramaile, sot osi osi, wet togon, so kotoṅoka n̄aba wetke mage mage, don sigigitne me don sinoine sogino n̄ine ra kima

natne eda edane, ea mane misuk piŋino ŋine sakesiake.

<sup>9</sup> Ŋine doku tau tau isisi natne eŋerop misuk okan nagukei, onokawane ŋine kotoŋinane wet dereret sogine tanik manikŋine qotkoinerop kine mane eamo qeliŋka warekoi.

<sup>10</sup> Pakimo ŋine ŋei musele okangoi, ea yemo Waom oŋom ŋibukimo, ŋine ŋei musele okangoi, ea wane eŋe dereret musele natne zok manerop koso ŋibonge, paki eŋe ŋibuki ŋine ŋei musele, so eŋine tanik manik so kait toqaine ea wakon lulukkoi.

<sup>11</sup> Nene mo ŋei musele okangone, ea wane weleine, yemo ŋene Grik ŋei eŋane tego me Yuda ŋei eŋane tego mida, me ŋene solaene mo kita kitatne me mi kita kitatne, kubai ŋei me sawek ŋei, ŋene taongo ŋine me mat ŋeine, qelit qeŋe me ŋei wawaine, midakaka, Kristoŋo yemo korop, kotozo qeturaŋ ŋone ge waremaiŋe, so geŋe me wet dereret sogine ea esopka ŋebongi paki, korop geŋe muselo ŋebu biraŋon okangi paki, oŋom keuzo ge waremaiŋe.

### *Mitiwo Wet Maep Korop Gege Ea Wane Don*

<sup>12</sup> Ŋine Anutuŋo mo mawesak ŋunge, ea wane ŋine eŋane ŋei ŋerep okane gemami, eŋe ŋinane zok manerop siminkamaiŋe. Ea wane ŋine masi tanik kine kine iwa yale okanikei, kima natne eŋane zok manerop qom borik okanikei, so mauluk onikei. Ŋine ŋinŋine ma ket bira nagu more, ŋei bororom okan onikei, so ŋei edo matali ŋunbi, ea wane ra qom gerep misuk marat kaiŋe,

wet momoine, eaŋo takotŋine okangi, birau kesi-ake.

<sup>13</sup> No ŋei mane keuŋino, eŋe don mane ki-maineŋo kine kineine mane mo matali mangeo, eŋe umat yewa mawaluke more, kimainane sot ea qelige maniake, ŋinane sot turuŋŋine eamo suaineŋo qelige ŋibonge, ea wane ŋine yale waka kima eŋane sot turuŋene qelige ebonikei.

<sup>14</sup> Ŋine wet dereret ŋineŋo kimakop ŋine ŋei ŋerep natne ea ebu malip onlukkei, masi yewaŋo tanik manik natne, ea korop yuanka waremaike. Pakimo, eaŋo sua wakone togoleakeo, yemo maine wet qedugu okora okora, ea wakoniake.

<sup>15</sup> So eŋe ŋine yale waka sikan ŋungi, bororomgo okan nagukeyi, pakimo bororomgo wet maep korop gege, eaŋo wetŋine warekaki, maine geulukkei, Waom eŋe ŋidora newan ŋungane, ŋine sola bikum weku okane more, wet maep okan luluke gekei, so naso baŋem Waom wane bakom kito mawaka gekei.

<sup>16</sup> Kristo wane don korop riwe morianine suaine, eaŋo yemo ŋinane kotonŋino ket more payake, kito ama nagu qema nagu so matogole qetogole eamo wet dereret korop okangei, miti sogine eŋet kitokei, miti musele eŋet kitokei, so bakom eŋet kitokei, Anutu koto ŋineŋo oi bakom okankau paki eŋet kitokei.

<sup>17</sup> Yeye kine kine okangei me rakei, yemo korop Waom Yesu wane eŋetko ora okangei, eamo ŋine eŋe bakomine kito more Anutu Magak oi bakomine kitokei.

*Nao Ŋanom, Ŋerep Medep So Nabok Magak*

### *Ejane Don*

<sup>18</sup> Njerep, njine njakopnjine ejane bango ge more añaene tewekkei, njine doku tau tau magu gemamiño yemo yale okane gekei, masi me tanik manik yewaño suaineze Yesu wane kaitko mayakatne okaniake.

<sup>19</sup> Nei, njine njanowekopnjine wet maep okanongi, so don togole misuk okan onge, paki weteene mau misuk sigileake, njine njanowekopnjine ejane simin njuniake.

<sup>20</sup> Njerep medep nigatne, njine yewamo doku tau tau magu njinane urata so numa njine togogle naso banjem nabok magak kine kine wane ra njunbi, añaene tewekeu, Anutuño detki njinane similekayake.

<sup>21</sup> Nabok magak njine dokoñine okanonbi, so-teene osiki busu misuk lelekei, njine njerep medewekopnjine sot osi osiwo okan onbi, kotoene misuk matalikei, eñe yale okanikeiwo, yemo eñe urata wele mane maine mama wane mi wetkekei.

### *Qelit Mama So Njei Waom Ejane Don*

<sup>22</sup> Urata medep njine ware warekopnjine, ejane don kine kine korop ea tewekei, njine don kelok okane more eñe osop osop geu, ejane ra more me edo njunikei wane ra urata maine maikei. Yale mida, ño njine weti suainane kaet njungi, njine naso banjem dereretnjoka nasoo, numaino, mau menañ geakane wetkeu, paki makei.

<sup>23</sup> Njine urata kine kine natne makei korop maikei yewa njine kotoño simile dere more wet korop togogleka mauluke maikei so Waomño

detki menageakane wetke makei, so ñei edo detpi menageakane midakaka.

<sup>24</sup> Ño detmami, ñine Waomño bañ turuñine ñiboniake, paki yemo mo oñom ñei ñerep magukoune eñane biñek kine kine wareki pamaike ea bañ ñine ñibongi makei, Kristo eñe ñei Waom welekatne, ñine añaïne teweke qelitrine qe okanbi, oñom ñinane ware ware wele okan ñuniake, yewao bañ ñibongi makei.

<sup>25</sup> So ñei mane eñe borikine mama, urata borikine mayake, ea wane turuñine yemo eñe bañ lewine borikineka mainge maniake, Anutu eñe ñei gege mageenane rokopko wanok one okanmaike, eñe bañ ñei borikine ea mi lolon oniake.

## 4

<sup>1</sup> Urata medep eñane ware warekopeene, ñine numa maine so bileka okanonikei, ñine mo detmami, ñinane ware ware Waomze suaine eñe yale waka weti qeliwo gemaïke.

### *Meñe Meñen Wane Don*

<sup>2</sup> Ñine meñe meñen wane numa togoleka matogole ma gekei, paki, ñine meñen kakei, naso yewao bañ detluk kaikei, ea wane ñine diamñine mau paki, meñe meñen gorop Anutu oi bakomine kito okane gekei.

<sup>3</sup> Naso yewaoka Waomño ñene qesiñ ñoniakane, weneñ meñen kakei, pakimo Anutuño ñenane numa maine lalage ñebongi, eñine miti donine ra more Kristo wane don sane rawakone edanikene, don kisi eamo sogino san pake, naso iwao yemo mo wakonge, pakimo ñei loutneñoka,



ea wane zok mi onmai, kine ea wane ra more na mulap urumgo iwa biranangoi metmaile.

<sup>4</sup> Ea wane njine mejenkau qesiŋ nangi eweke more, na miti ea didiwo maine ra qelaŋangale, Waom eje naŋane yalewa wetkemaik, na urata ea maine maikale.

<sup>5</sup> Nei qelaŋine mali malipene midaine doku tau tau magu ea wane ŋadino gemami, eŋerop gekei, naso yewao njine numa bile so dereret tanik manik koboboine okanikei, njine naso baŋem ewek luke more, eje Yesu Kristo wane numa me tanik manik bile ea sikan onikei.

<sup>6</sup> Naso baŋem njine don maineka raikei, nei don kine kine desikei wane onmai, ea raikei, paki njine maine detlukeu paki, don koboboine nei korop mainge ebonikei.

### *Tikikus So Onesimus Erane Don*

<sup>7</sup> Nenane kima maepze Tikikus, eje urata nei mayakakatne, so eje Waom wane uratao qelit nei kimaze wekumane, oŋo urata kine kine mamaile ea wane donkisi baŋ ŋidaniake.

<sup>8</sup> Ea wane na eje talekawe njinano umaik, njene korop iwa daleo gemaine, nenane don tanik manikze so kineze ea wane ŋidaniake, so eje don ŋidane more, eje njinane wet mali malipnjine, ea korop ma togoleake.

<sup>9</sup> Eŋerop weneŋ birakawe uyake, yemo Onesimus, eje nenane kima maepze mayakakatne, eje njinane magu oŋine Kolosai kimaŋine, eto kine kine iwa wakonmai, ea wane donkisi baŋ korop okanŋunikeik.

### *Don Qoiqoino Pauloŋo Kaiwe Maine Ebonge*

<sup>10</sup> Aristarkus, eɲe narop mulap urumgo wenen metmaite, oɲo ɲine kaiwe maine ɲibonmaike, so Mareko eɲe Barnabas wane ɲeweune, eɲe yale waka ɲine kaiwe maine ɲibonmaike, ɲine eɲane don kisiine mo ra ɲidanbe detkoi, wane ɲinano u lotkeakeo, yemo ɲine kima okane more oi bakom okankakei.

<sup>11</sup> Yosua, eɲetine mane Yustus, eɲe yale ɲine ka kaiwe maine ra ɲibonmaike. ɲei iwa eɲe Yuda ɲei, eɲe kareweɲoka narop Anutu qeli ewe zominane urata mamaine, so eɲe koropɲo zok urata suaine manerop qesiɲ nangoi.

<sup>12</sup> Epapras ɲo kaiwe maine ra ɲibonmaike, eɲe ɲinane kimaɲine maguo ɲine, so eɲe Kristo Yesu wane qelit ɲei, eɲe naso banem ɲinane ra gereunerop meɲenka okanmaike, eɲe Anutu meɲenkaki, oɲo ɲibuki ɲine doku tau tau magu wele okane more gesoke togole ɲei okora okorao lalipke okorakei, paki eɲane don wane rokopko kine kine detluke Anutu wane simile yewaka mogare gekei.

<sup>13</sup> Na eɲane kineine maine ɲidanbe, eɲe urata togogole qesiɲɲune more ma okanmaike, ɲine so Laodikea matko ɲine doku tau tau ɲei ɲerep eɲane so Hierapolis matko ɲine eɲane wenenɲ.

<sup>14</sup> Luka, ɲenane dokta maepze eɲane zok sim-inɲon mageake, eɲe so Demas ere kaiwe maine ra ɲibonmamik.

<sup>15</sup> ɲene kaiwe maine ra ɲibonmaine, ea kima kopze Laodikea matko gemami so Nimpa so doku tau tau magu Nimpa ɲerep kimaze mane wane matko lewan okanmami eɲe ebonikene.

<sup>16</sup> Ge kibi iwa dapotnom qoeki, ea wane ḡadino ge desikene, ea yaleka doku tau tau magu Laodikea matko ḡine eḡano weneḡ dapotpi, eḡe desikei. Naso weku yewaoka, na kibi mane Laodikea eḡano qe ebongole, ea weneḡ daposikei.

<sup>17</sup> So Akipus olasikei, ge Waom wano ḡine urata makone, ea manom qoe wareake.

<sup>18</sup> Nae meteneḡo kibi sisinimde iwa qemaile, Na Pauloḡo kaiwe maine ḡibonmaile! Na mulap urumgo pamaile, ea deskei!

Anutu wane dan gunutḡo maine ḡinano tako rakot pa ari payake.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**  
**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

646541a1-8d36-5993-802c-6bb850da5963